

Staatibudsjetti 2020:

SUURI LISSÄYS KULTTUURIBUDSJETISSA

Rejeeringin ehoitus kulttuuribudsjettiin vuole 2020 oon 19,9 miljartii kruunuu. Se pittää sisälä 4,9 miljartin kruunun lissäyksen sen suhteen mitä vuoen 2019 hyväksytyssä budsjetissa oli. Justeerattuna siihen ette NRKn finansieerathan staatibudsjetin kautta vuosta 2020 alkkain, ja departementtistrukturiiin tehään muutoksii, oon lissäys 850 miljuunaa kruunuu eli 6,7 prosenttii.

- Tällä budsjetilla met viemä etheenkäsän ambisjuunii ette koko maassa pittää olla elläävä kulttuurielämä. Ette saatama pykätä hyvvi samfynniita ja vahvan demokratiin kaikile, tarvittemma laajan kulttuurisatsingin mikä tukkee eistymistä ja monenlaisuutta. Sen tähän tässä budsjetissa satsaama ytheissiin areenhoin jotka saatethaan anttaat ihmisille unikkii kokemuksii ja missä kulttuurielämällä oon maholisuus kukkiit, sannoo kulttuuri- ja samanarvoisuusministeri Trine Skei Grande.

JOITAKI PÄÄSATSINKKIITA

Nasjunaaliset kulttuuripytingit:

Sitä varten ette nostaat framile kulttuuriperinön monenlaisuuen Norjassa, ehoittaa rejeerinki 291 miljuunaa kruunuu kymmenelle uuele prosjektile nasjunaalissii kulttuuripytingiitä varten vuona 2020. Lisäksi saahan kulttuuripytingit koko maassa 768 miljuunaa kruunuu tulleeville vuosile.

Museumit oon tärkkeet kulttuuriperinön hallittiiijat ja tieonjakajat. Rejeerinki ehoittaa ette museumiile ja visuelliile kynstile annethaan kuurttoo 2,2 miljartii kruunuu, mikä oon 340 miljuunaa kruunuu enämen ko vuona 2019. Tästä oon suunile 280 kruunuu varattu siihen ette Nasjunaalimuseumin siirethään uushiin lukaanhiin Vestbanenissa.

Vapaaehtoiset organisasjuunit:

Rejeerinki aikkoo hyvviin kuurto-orningiitten avula tukkeet laajuutta ja monenlaisuutta vapaaehtoisilla kentiä, organiseeratussa idretissä ja itteorganiseeratuissa aktiviteetiissa. Sen tähän rejeerinki ehoittaa ette lisäthään vapaaehtoisten organisasjuuniitten momsikompensasjuunii 92 miljuunalla kruunula. Vapaaehtoiset organisasjuunit tultais siis saamhaan 1,7 miljartii kruunuu vuona 2020.

Monenlaisuus ja samanarvoisuus:

Moolina oon ette usseemat saahan kokkeet hyvvi kulttuuritarjouksii, ja rejeerinki ehoittaa 24,5 miljuunaa kruunuu erilaisile kulttuuritoimile jotka stimuleerathan monenlaisuutta, integreerinkkii ja työtä köyhyyttä vasthaan.

Rejeerinki halluu työtälä sen etheen ette kaikila oon samanarvoisuus ja vapaus tehä omat valinat. Budsjetissa vuole 2020 ehoittaa rejeerinki 7 miljuunan kruunun lissäyksen ette viehään etheenkäsän samanarvoisuuen strategiita mikä koskee ihmisi keilä oon heikentynny toimikyky, ja 6 miljuunaa kruunuu ette vahvistethaan satsaamista seksuaalista syrjimistä vasthaan.

Meedian kuurominen:

Se ette kuuromhaan mediakenttää, tekkee maholiseksi hyvän uutisproduksjuunin ja ajatusten vaihettelun ylheisesti koko maassa. Rejeerinki halluu uuistaat meedian kuuromisen ja tukkeet paikallissii meediumiita koko maassa, ja kans innovasjuunii, kehitystä ja uuen luomista meediabransjissa.

Tämän ilmoitetun muutoksen yhteydessä mikä koskee suoraa meediakuurtto pienile, paikallisille aviisiile, on ehoitettu ette lisäthään kuurtto 30 miljuunalla kruunula ylimeriodin ajan, mikä tekkee muutoksen helpomaksi. Lisäksi tullee 10 miljuunan kruunun lissäys jolla justeerathan hinttoin ja palkkoin kassuuminen.

Innovasjuunikuurtto lisäthään 10 miljuunalla kruunula, ja sen on suunattu aviisiitten digitaliseerinkhiin ja sovittelhuun. Muutokset postilaissa vaikutethaan kans aviishiin, ko on vähemmän päivii koska postin jajethaan.

Filmi ja daattapelit:

Rejeerinki on tehny daattapelistrategiin jossa on moolit ja toimet daattapelipolitikkii varten vuosiin 2020–2022 aikana. Staatinbudsjetissa vuoete 2020 ehoittaa rejeerinki ette daattapelikentäle annethaan 10 miljuunaa kruunuu lissää kuurtto.

Rejeeringin mooli on tukkeet laajaa ja monipuolista filmitarjousta jossa on korkkee kvaliteetti. Sen kautta ette levitethään valttaa ja rekiunaliseerathan filmipolitikkii, toivoo rejeerinki ette se saattaa olla myötä lissäämässä kilppailuu ja monenlaisuutta. Rekiunaaliile filmitoimile on ehoitettu likele 18 miljuunan kruunun lissäystä.

Kieli:

Kieli ja litteratuuri on tärkkee osa norjalaisesta kulttuuriperinöstä, ja ehtona demokraattisessa osalistumisessa. Rejeerinki ehoittaa ette kieli saapi 9,3 kruunuu lissää vuoete 2020 budsjetissa. Samala rejeerinki työtelee ehoituksen kans ette tehthään sekä uuen kaiken täkkäävän kielilain ja uuen isotinganmellingin kielen ympäri. Moolina on varmistaat norjan kielen, sekä suojela ja eistääät minoriteetikielii joista Norjala on eesvastaus ottaat vaarin.

Oversatt til kvensk av Kainun institutti – Kvensk institutt 07.10.2019